



JUDICIAL SYSTEM MONITORING PROGRAMME
PROGRAMA MONITORIZA SAUN BA SISTEMA JUDISIÁRIU

Komunikadu Imprensa
06 Dezembru 2023
Munisípiu Dili

JSMP Realiza Kampaña Tráfiku Umanu iha Salaun Auditórium Liceu, UNTL Hetan Reazen Pozitivu hosi Parte Interessadu Xave Sira

Iha 01 Dezembru 2023, JSMP hamutuk ho UN Women Timor-Leste realiza kampaña tráfiku umanu iha Salaun Auditórium Liceu, Universidade Nasionál Timor Lorosa'e (UNTL), Dili.

Objetivu hosi atividade kampaña tráfiku umanu ne'e mak atu loke ema hotu nia hanoin no hasa'e konsiénsia públiku, liuliu juventude, comunidade no estudante sira kona-ba saida mak tráfiku umanu no oinsa atu bele identifika, relata, prevene no kombate bainhira krime ne'e mosu iha comunidade nia leet.

"JSMP fiar katak ho atividade kampaña ne'e, bele hasa'e tan koñesimentu públiku nian, liuliu comunidade, juventude no estudante universitáriu sira, nune'e sira bele kontribui ho efetivamente ba esforsu Governu Timor-Leste nian ba prevene no kombate Tráfiku Umanu no Violénsia Bazeia ba Jéneru. JSMP mós hanoin katak kampaña ne'e hanesan meu ida ba prevene krime tráfiku umanu no violénsia bazeia ba jéneru iha Timor Leste," dehan Diretora Ezekutiva JSMP, Sra. Ana Paula Marçal.

Nia hatutan tan katak ema barak ladun hatene kona-ba saida mak tráfiku umanu no no nia prosesu sira, tanba ne'e maka ita presija habelar informasaun ba ema hotu-hotu liuhosi treinamentu sira ne'ebé maka durante ne'e ekipa JSMP hala'o iha terenu atu nune'e ema bele komprende no hatene loloos ninia lala'ok no oinsa bele evita krime ida ne'e.

Enkuantu, representante Prezidente Komisáriu Luta Anti Tráfiku Umanu, Komisária Sra. Sandra Carvalho, hateten katak krime tráfiku umanu ne'e krime ne'ebé mais kompleksu tebes ho nune'e ita presija toma atensaun didi'ak. Ida ne'e, tanba bainhira ema ruma halo krime ida ne'e defisil tebes hodi ko'alia sai. Dalaruma krime tráfiku umanu ne'e presija tempu naruk bainhira halo julgamentu iha tribunál tanba kauza hosi hahalok sira ne'ebé maka autór sira halo ne'e defisil tebes ba juis sira hodi foti desizaun tanba faktu sira la mensiona hotu iha akuzasaun no dalaruma bele hamosu tan faktu ne'ebé la loos ho nune'e presija tau atensaun másimu ba krime tráfiku umanu atu nune'e bele prevene no hamenus krime ne'e.

Komisária ne'e mós hatutan katak krime tráfiku umanu barak mak mai hosi área rural sira. Nune'e, nia husu ba comunidade sira hotu labele monu ba lasu tráfiku umanu, antes trata dokumentu ruma presija buka informasaun loloos hosi entidade relevante sira, labele tur de'it hodi hein ema ruma nia informasaun falsu no grupu balun nia informasaun hodi tuir sira. Iha nia liafuan ikus, Komisária hateten katak atu prevene no kombate tráfiku umanu, presija ita hotu nia kolaborasaun

Iha parte seluk, Prokuradór Distritál Dili, Dignísimu Dr. Matias Soares, hateten katak krime tráfiku umanu akontese barak iha área rurál sira no comunidade maioria maka la hatene kona-ba krime ne'e nia prosesu. Nune'e, liu hosi projetu ne'ebé maka JSMP hala'o iha terenu ne'e di'ak tebes ba comunidade sira hotu, liuliu ba comunidade sira iha fronteira. Tanba krime tráfiku umanu barak maka mosu iha fronteira, tanba ne'e ita presija halo prevensaun ba krime ida ne'e hodi nune'e comunidade sira labele sai vítima ba krime ida ne'e.

Prokuradór ne'e hatutan katak dalaruma vítima ba trafiku umanu ne'e la sente katak buat sira ne'e hanesan explorasaun ida. Tanba ne'e, ita presija habelar liután informasaun ba comunidade sira hotu iha área rurál sira no inklui kapitál Dili. Atu nune'e sira labele sai vítima hela de'it ba krime ida ne'e. Krime ida ne'e defisil tebes hodi halo investigasaun tanba ema sira ne'ebé halo krime ne'e la ko'alia sai hotu no defisil tebes hodi foti informasaun loloos.

Entretantu, Provedór Direitu Umanu no Justisa, Sr. Virgilio Guterres hateten katak ita presija prevene no elimina krime tráfiku umanu. Tanba ne'e, husu ita hotu atu hatutan informasaun ba comunidade sira iha área rurál sira para sira mós bele entende krime ne'e nia prosesu. Bainhira ema ruma halo lasu ho lia falsu ruma, sira bele entende ona hodi evita ba hahalok aat sira ne'e.

Provedor mós husu ba Governu Timor-Leste presija kolabora hamutuk ho entidade hotu-hotu para bele harii rede advokasia ne'ebé forte hodi bele tau-matan didi'ak ba krime tráfiku umanu. Iha rede referrál ne'e la'ós iha Timor-Leste de'it hodi haree ba krime tráfiku umanu maibé iha mós iha estrangeiru, tanba krime ida ne'e la'ós akontese de'it iha Timor-Leste. PDHJ mós bele foti informasaun hosi parte imigrasaun nian hodi bele hatene loloos prosesu sira ne'e hotu, iha krime tráfiku umanu la'ós KLATU de'it maka toma responsabilidade, maibé ita hotu iha responsabilidade atu ita bele prevene krime tráfiku umanu.

Reprezentante UN Women Timor-Leste, Sra. Lumena Freitas, hateten katak projetu ida ne'e hanesan onra ida ba UN Women tanba tinan ida ne'e nia laran, UN Women ho Ministériu Interiór fó apoiu finanseiru hodi implementa programa prevensaun no responde ba tráfiku umanu iha nivel comunidade. Tanba ne'e hakarak hahú ho espresa ami nia gratidaun ba Ministériu Interiór ba serbisu hamutuk ida ne'e. Iha prosesu implementasaun, UN Women hetan parseiru ida ne'ebé ativu tebes maka JSMP hodi ajuda implementa programa ida ne'e iha terenu.

Reprezentante UN Timor Leste ne'e hatutan katak apoiu finanseiru hosi Ministériu Interiór no UN Women ne'e sai ona instrumentu ida hodi halo peskiza ida kona-ba kontestu tráfiku umanu iha Timor-Leste. Peskiza ne'e la'o hela no hein katak sei remata iha tempu badak ka molok fulan ida ne'e remata. Liuhosi peskiza ida ne'e, ita hetan ona informasaun balun ne'ebé bele ajuda ita hodi halo estratéjia ba oin.

JSMP organiza ona treinamentu sira iha nível comunidade kona-ba igualdade jéneru, tráfiku umanu, violénsia bazeia ba jéneru no lideransa transformativu. Formasaun ka treinamentu sira ne'e bele hasa'e koñesimentu individuál no comunidade sira nian hodi koñese no komprende di'ak liután kona-ba tráfiku umanu. Estabelese rede mobilizadór iha comunidade nia leet hodi koletivamente prevene no

responde ba krime tráfikú umanu. Kria ona guia ba *first responders* sira hodi responde ba kazu tráfikú umanu sira bainhira mosu ona iha comunidade nia le'et.

Iha atividade kampaña ne'e mós mobilizadór sira hosi Suku Batugade ne'ebé antes ne'e JSMP estabelese no fasilita ona formasaun ho matéria sira relevante ba tráfikú umanu no violénsia bazeia ba jéneru hatudu teatru kona-ba saida mak tráfikú umanu, oinsa bele identifika, halo keixa no prosesa krime trafikú umanu. Autór sira teatru nian hala'ó funsaun ka knaar hanesan juís, polísia, xefe suku, polísia imigrasaun, família vítima (inan), vítima, trafikante ka autór ba krime trafikú umanu (kondenadu), traballadór sosiál no representante sociedade sivíl no naradór ka introdutór. Teatru ne'e hanesan meu ida hodi hasa'e konsiénsia públiku nian kona-ba oinsa bele prevene krime tráfikú umanu no oinsa bele halo prosesu ba krime tráfikú umanu.

Partisipa iha atividade kampaña ne'e mak hanesan Dignísima Adjuntu Prokuradór Jerál Repúblika, Dra. Angelina Saldanha, Prokuradór Distritál Dili, Dignísimu Dr. Matias Soares, Provedór Direitu Umanu no Justisa, Sr. Virgilio Guterres, representante Prezidente KLATU, Sra. Sandra Carvalho, Vise Reitor UNTL, Representante Ministériu Justisa, Representante Diretor PSIK, Komisaun Direitu Labarik, Representante Komandante Jerál PNTL, Mobilizadór/a, Parseiru Sociedade Sivíl, Dosente no Estudante hosi Universidade UNTL, UNPAZ, UNITAL no UNDIL, Mídia no Representante Grupu Juventude sira.

Atividade kampaña ne'e remata ho Refreshments & 16 – days of Activism Microlet Showcase.

Atividade kampaña ne'e realiza ho apoia finanseira hosi Governu Timor-Leste, Ministériu Interiór ne'ebé diretamente jere hosi ajénsia Nasoins Unidas UN-Women.

Atu hetan informasaun liután favór kontaktu:

Sra. Ana Paula Marçal
Diretora Ezekutiva JSMP
Email: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl